

श्रीहित चाचा वृंदावन दस जी महाराज कृत

# श्री करुणा बैली



श्री हित प्रताप चंद्र गोस्वामी जी महाराज

श्री हित मन मोहन गोस्वामी जी महाराज

श्री हित निमिष गोस्वामी जी महाराज



!! श्री हित राधावल्लभो जयति !!  
!! श्री हित हरिवंशचंद्रो जयति !!

श्री व्यास सुवन करुणा अब करौ, मो सिर चारू चरण रज धरौ ।  
श्री हितरूप कृपा की आशा , याचत उर धरि बडौ हुलासा ॥१॥

करुणा निधि तुम नाम कहावै, मोसौ दीन चरण रति पावै ।  
प्रथम करौ करुणा गुरु राज, जिनको शरण गहे की लाज ॥२॥

पुनि ये रसिक सुद्रष्टि निहारौ, मोपै करुणा सदा विचारौ ।  
करुणा दया साधू गुरु करि हैं, मो उर ताप तिमिर सब हरि है ॥३॥

श्रीगुरु साधु जाहि अपनावै, तेई जन हरि के मन भावै ।  
जिनको विरद विदित जग माँही, अभय करै पकरै जा बाँही ॥४॥

हैं करुणा निधि करुणा कीजै, अब निज शरण रावरी दीजै ।  
ऐसी सदा विचारौ चितही, हौ तव कृपा मनावत नितही ॥५॥

विनती सुनो साधु मन रंजन, तुम पद कमल सकल दुख गंजन ।  
अहो नाथ ! तुम दीन दयाला, अपने कौ कीजै प्रतिपाला ॥६॥

श्री हित निमिष गोस्वामी जी महाराज  
श्री हित राधावल्लभ लाल मंदिर , वृंदावन  
[www.shriradhavallabh1a1.com](http://www.shriradhavallabh1a1.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

मो करनी नहि चित में धरिये, अपनी कृपा ओर हि ढरिये ।  
जो मम औगुन ग्रहन करौगे, अपनी विरद आप बिसरौगे ॥७॥

करुणामय यह विरद बढ़ावौ, जो हमसे दीनन अपनावौ ।  
अहो कृष्ण पद रति अब पाऊँ, जुगल केलि कल कीरति गाऊँ ॥८॥

देहु कृष्ण यह भक्ति सुधन है, तुम दासन के हिय दृढपन है ।  
भक्तन की अभिलाषा दायक, हो राधापति तुम सब लायक ॥९॥

देहु देहु करुणा करि पद रति, तुम समान को त्रिभुवन में पति ।  
हे व्रज ईश सीस दीजै पद, तुम ही परम दया करुणा हृद ॥१०॥

करौ अनुग्रह अपने जन कौ, जैसे गौ चाहत बच्छन कौ ।  
यौ हरि देहु भक्ति वरदानै, जा कीरति कौ जगत बखानै ॥११॥

हे गोकुल विधु ! वदन दिखावौ, नैन चकोरन सुधा पिवावौ ।  
निरखि सफल हे है दृग मेरे, पावन गुण गाऊँ मै तेरे ॥१२॥

श्रीहित निमिष गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

अहो अहो त्रिभुवन के स्वामी, तुम हौ सब के अंतरयामी ।  
याते अपनी ओर निहारौ, मेरो दोष न चित में धारौ ॥१३॥

मिलन आस की बेलि निपाई, ऐसी करौ जू अफल न जाई ।  
तुम पद दरसन पूरण फल है, दै सतसंगत सींचत जल है ॥१४॥

यह अभिलाषा रहत मन नित है, प्राणनाथ मम आरत चित है ।  
तुम समरथ हौ दीन महाई, शरण गहे की तुम्है बड़ाई ॥१५॥

हे ब्रज दूलह ! नन्द दुलारे ! कब ऐहो दृग आगे प्यारे ।  
नहि जानै किहि छिन दरसौगे, तपत हिये कब सुख बरसौगे ॥१६॥

कानन सघन वीथियन माँही, निरखौ प्रिया अंश गरवाही ।  
पूरित नेह वचन सुनि हौ जब, श्रवण लाभ फल हरि गनिहौ तब ॥१७॥

हे वृन्दावनचन्द्र विनोदी, देहु दान हौ ओटत गोदी ।  
बात तुम्हारी जीवन मेरी, सब विधि पूजौ आश सबेरी ॥१८॥

श्रीहित मिमिव गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

परम दया के मन्दिर तुम हीं, यातैं शरण गहत है हमही ।  
राखो नाथ कृपा करि नैरैं, अहो कृपा निधि हम नित टैरै ॥१९॥

तुम गुण गहर कमल दल लोचन, अपने जन के सब दुख मोचन ।  
हे सुन्दरवर तुम हौ नगधर, दिजै अभयदान सिर कर-वर ॥२०॥

सुनों कान दै विनती हो हरि, तुमहिं सुनाऊँ बहुत भाँति करि ।  
अपने को सुधि आपु न लीजै, ऐसी कहा निठुरता कीजै ॥२१॥

और बात नहि चितहि विचारौ, कृपा द्रष्टि मम ओर निहारौ ।  
इहि विधि नाथ तुम्हारो जस है, जो बिसरौ तौ का मम बस है ॥२२॥

अहो कृष्ण ! जो दास कहावै, सो क्यों जगत माँहि दुख पावै ।  
यह तौ बड़ी त्रास आवत है, कृपा अवधि क्यों तोहि भावत है ॥२३॥

कबहुँ न करौ दयाल ऐसौ अब, चाहत शरण तुम्हारी हम सब ।  
अपने जन की लज्जा गहिवै, बहुत न आवत है प्रभु कहिवै ॥२४॥

श्रीहित निमिष गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

जाकौ अनुग सो न सुधि लेहि, वह न कहावै नाथ सनेही ।  
अगनित दूदन्द देह के पथ है, तुम बिन टारन को समरथ है ॥२५॥

बार-बार हम हरि यह जाचै, तुम पद छाँडि अनत नहि राचै ।  
ऐसी सुमति देहु करुणानिधि, कहौ प्राणपति मिलिहौ किहि विधि ॥२६॥

कब उपजेगी यह मन माँही, राखौगे मोहि चरणन छाँहि ।  
मै तो निश्चय यहि करि है, तुम धौ जियमे कहा धरी है ॥२७॥

खोटो खरौ परौ जो शरणी, कहा देखिवे ताकी करणी ।  
विरद तुम्हारो विदित रसाला, अब तौ करे वनै प्रतिपाला ॥२८॥

कब ऐहो इन नैननि आगे, कब ये रूप तिहारे पागे ।  
हैं राधापति तुम पद दरसौ, सुजस रावरो गावत सरसौ ॥२९॥

हैं अभिराम श्याम वनवासी, कब परसौ वे पद सुखराशी ।  
अब उर आशा अधिक भई है, तुम धौ मनमे कहा ठई है ॥३०॥

श्रीहित मिमिव गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

देहु न नाथ अनाकनी मोसौ, अपनी व्यथा सुनाई तोसौ ।  
भली लगै सो करिहौ ब्रजपति, मेरे तौ तुम ही हौ हरि गति ॥३१॥

अहो जुगल विधु मो दृग भूषण, कब सींचोगे प्रेम पियुषण ।  
कौतुक मिथुन सकल सुख ऐना, बन घन रमत निहारौ नैना ॥३२॥

निभृत निकुंज ते निकसो जबही, मेरी द्रष्टि परौगे तब ही ।  
कब हे है वह मंगल बिथियाँ, आवत युगल अंश भुज धरियाँ ॥३३॥

अब कछु कहत परस्पर बानी, सो तौ परम नेह-रस सानी ।  
ताहि सुनत बदलै गति तन की, पूजै अभिलाषा सब मन की ॥३४॥

हे सुखरासि दास्य अब पाउँ, हे प्रभु तुम पद कृपा मनाऊँ ।  
कानन कमनी केलि विलोको, निरखत पलक धरनि गति रोको ॥३५॥

ऐसौ बानक बनि है कबहूँ, करुणामय विनती सुन अबहूँ ।  
अति अभिराम श्याम सुखदाता, तुम पतितन पावन विख्याता ॥३६॥

श्रीहित मिमिव गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्री हित राधावल्लभो जयति !!  
!! श्री हित हरिवंशचंद्रो जयति !!

अहो अकिंचन जन-मन भावन, भक्तन उर आनन्द बढ़ावन ।  
दासन भीर सदा लागत हौ, अब कछु नाथ दूर भागत हौ ॥३७॥

जो तुम कहो करम तुम खोटे, तौ तुम हरि का विधि हौ मोटे ।  
करमन के बस तुम जन होई, तौ तुव भजन करै क्यों कोई ॥३८॥

जो तुम बड़े करम ठहरावौ, तौ तुम क्यों जग-ईश कहावौ ।  
जाके दंड जगत ये नाँचै, सोई धनी कहावै साँचै ॥३९॥

जो हरिदास करम बस कहिये, तो प्रभु तुमहि न ऐसी चाहिये ।  
नीति अनीति आपही देखो, हमकौ याकौ बड़ो परेखौ ॥४०॥

उत्तम करमन करि जो तरिये, तौ तुमको काहे अनुसरिये ।  
ये हठ छाँडि देउ अब हरि किन, करमन लार बहावौ प्रभु जिन ॥४१॥

साधू सभा के तुम ही मंडन, करो कटाक्ष कर्म होय खंडन ।  
हो ब्रजनाथ साथ देउ मेरो, ऐचौ पकरि बाँहि हौ तेरो ॥४२॥

श्री हित निमिष गोस्वामी जी महाराज  
श्री हित राधावल्लभ लाल मंदिर, वृंदावन  
[www.shriradhavallabhilal.com](http://www.shriradhavallabhilal.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

हौ भूल्यो संसार-विषय-वन, भ्रमत फिरौ पाऊँ पीड़ा तन ।  
तुम सौ दयाल देखि छिटकावै, कहौ कृष्ण को पार लगावै ॥४३॥

यह गति देखि जो न कसकै मन, तो हरि कहा कहाये तौ जन ।  
अपने को स्वामी जो तजिहै, लेहु विचार कौन हरि लजिहै ॥४४॥

जो अगतिन की गति न करि है, कहो कृष्ण को फैट पकरि है ।  
अब चितवौ रंचक सुद्रष्टि कर, अखिल भुवन तौ जाय नाथ तर ॥४५॥

जाकौ जतन कहा करीवै है, रंचक दया हृदय धरिवै है ।  
तूम तौ दीनदयाल-प्रभु अति, हौ हित रूप चरण पाऊँ रति ॥४६॥

तुम हरि उर आनन्द भरन हौ, भक्तन की आरति जु हरण हौ ।  
अब न गहर कीजै इत देखो, जैसे टरै करम की रेखो ॥४७॥

हो दुख दमन रसिक राधापति, भक्तिदान दीजै उदार-मति ।  
दाता देत कछू नहि राखै, श्रीगुरु-सन्त भागवत भाखै ॥४८॥

श्रीहित निमिष गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्री हित राधावल्लभो जयति !!  
!! श्री हित हरिवंशचंद्रो जयति !!

देहु देहु पद सेव सदाई, तुम दानी हौ कृपण महाई ।  
सब जुग माहि विदित यह गाथा, जो अनाथ सो किये सनाथा ॥४९॥

ताते विरद पुरातन गहिये, तुमसौ बार बार हरि कहिये ।  
वृन्दावन हित रूप रावरे, कब परी हौ मम द्रष्टि सांवरे ॥५०॥

राधा रसिक कहावौ नागर, भक्तन की गति करुणा सागर ।  
वरद सुनाई बेली करुणा, अब तौ नाथ कृपा दिस ढरुणा ॥५१॥

हौ नहि लोक भ्रमन ते डरोई, एक बात कौ संशय करोई ।  
बिसरौ जिन उर ते भगवंत, इच्छ बस तन धरो अनन्त ॥५२॥

जो कोउ जाकी शरणे-आवै, यद्यपि ओगुनी दण्ड न पावै ।  
अहो शरणागत-पालक गिरधर, अब मो लाज राख सुन्दरवर ॥५३॥

सती चढी सर अगनि न जारै, कहौ नाथ वह कहाँ पुकारै ।  
प्यासे कौ जल नदी न देई, तौ हरि कहौ कौन सुधि लेई ॥५४॥

श्री हित मिमिव गोस्वामी जी महाराज  
श्री हित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

प्रफुलित कमल रोष रवि ठानै, इहि दुख वारिज कहाँ बखानै ।  
चन्द्र चकोरनि ते दूर रहि है, हो हरि व्यथा कहाँ वह कहि है ॥५५॥

दीपक मन्दिर हरै न तमको, तौ प्रभु तुम बिसरावौ हमको ।  
जो जल काठ न तरै गुसाँई, तरुवर बैठन देत न छाई ॥५६॥

सुनौ प्राणपति तौ कहा बस है, जोपै उन मन धरयो विरस है ।  
ये व्रत तजै तो अचरज नाहीं, पै न संभवै प्रभु तुम मांही ॥५७॥

अहो कृष्ण अब करो न ऐसी, जैसी तुम जु विचारौ तैसी ।  
नैक सुद्रष्टि करौ मम ओरी, कारज होय बात यह थोरी ॥५८॥

हे बलबीर धीर मति पनके, रक्षक सदा आपने जनके ।  
त्राहिमाम शरणागति आयौ, त्याग न उचित जु भृत्य कहायौ ॥५९॥

सुनौ कान दै कानन वासी, अब जिन जगत करावौ हाँसी ।  
तुम जु ज्ञान घन त्रिभुवन ईसौ, अभय कर कमल धरौ मम सीसौ ॥६०॥

श्रीहित निमिष गोस्वामी जी महाराज  
श्रीहित राधावल्लभ लाल मंदिर, वृंदावन  
[www.shriradhavallabhla.com](http://www.shriradhavallabhla.com)



!! श्रीहित राधावल्लभो जयति !!  
!! श्रीहित हरिवंशचंद्रो जयति !!

मै विनती प्रभु करी घनेरी, कही रुचि दैनी प्रेम पहेरी ।  
सुनके नाथ धरो मन माँही, जैसे पर्यौ रहौ पद छाँही ॥६१॥

तुम लायक दायक सबही सुख, दर्शाओ काहे न सुन्दर मुख ।  
पाउँ यह प्रसाद शोभा-घर, ब्रजपति नन्दन जो राधावर ॥६२॥

श्रीहरिवंश प्रताप तै, वरणी करुणा-बेलि ।  
ब्रजभूषण राधा धनी, दरसावो रस-केलि ॥  
सम्बत सै दस आठ गत, चार वरष उपरन्त ।  
कृष्ण दास अभिलाष हित, कथी सुनौ हरि सन्त ॥  
जेठ वदी पाँचे सु दिन, बलि हित रूप विचार ।  
हरि गुरु साधु कृपा करि, वरन्यौ यह सुखसार ॥  
दिनबन्धु करुणा अवधि, भक्तवत्सल यह नाम ।  
वृन्दावन हित लेउ सुधि, विरद बढै ज्यौ श्याम ॥



॥इति श्रीकरुणाबेली चाचा वृन्दावनदासजी कृत सम्पूर्णम् ॥



श्रीहित निमिष गोस्वामी जी महाराज  
श्रीहित राधावल्लभ लाल मंदिर, वृन्दावन  
[www.shriradhavallabhilal.com](http://www.shriradhavallabhilal.com)